

見素林公奏議

序



見素集卷二

後學黃佐 校正

族子 富 編集

後學柯維騏 重校

孫男 及祖重梓

奏議

西巡稿

撫處王武等疏

題為脩政本以弭大盜事節該欽奉

勅江西賊情重大茲特命爾前去巡視彼處地方爾至彼

廣詢博訪深究事情嚴督所司設法撫捕務令盡絕凡有興利除害弭盜安民良法悉聽爾便宜處置欽此欽遵行據江西布政司呈准分守南昌道右叅政王綸咨抄蒙巡視案驗即將王武等親自省諭本分農業毋再懷疑執拘構黨召禍弟姪手下嚴加禁約不許指以捕盜妄拏平人報復讐怨誑虜財物姦騙婦女燒燬房屋非對賊陣務在生擒不許斬首且王武等名不在官性猶近野群居互長則禍釁易生私食盡公則人情難久陽訶陰護默奪潛消必有可乘之機善處之術會議通呈等因會同南昌道分巡僉事王

純親自省諭王武等本分耕種不許多集無賴生事擾人招尤啓釁外議得王武已故房兄王再瑛始雖爲盜尋亦革心自首助官擒拏首惡致被逋誅餘黨讐殺七命後王武率先兵便効順竭勞前後斬獲一百四十餘人今又聽撫求哀宜加善處合行瑞州府知府周津通判甘文紹將王武弟姪手下一名名研審真的年貌籍貫異省者資給衣糧查發附近者省令農業生理但王武住居與吳城相近孤懸賊壘肆衝賊路而吳城又當高安上高新昌奉新交界之處合無吳城築立官堡高安輪撥機兵一百名同上高

新昌各縣捕盜主簿輪差一員任彼提督各給行糧
常川操守一季一換王武地方再立民哨止許招募
五十人王武爲哨甲弟姪王昌王宏并手下姚惟高
五人爲哨手每手管九人一人爲非九人同哨甲覺
舉違者連坐俱聽官堡鉗束無事幹家有警聽調朔
日赴該府望日赴該縣呈遞并結聽候發放其工雇
之資每年哨甲六兩哨手四兩哨丁三兩將已決并
監故賊首鄧遲八李昌三周申三等舊遺田產查勘
明白近者撥種遠者兌換名爲哨田止納正糧之外
不編別差量其歲收以足前數倘有不敷或支官錢

增置或僉均從津貼仍自高安直抵新昌每二十甲
立一鋪舍編僉司兵脩理路道使文移絡繹公私經
行府縣按月查點上司不時巡歷或寓宿官堡就近
行事擾習既久性度自馴易荒阻爲通衢蕪荒梗爲
善俗聲迹相倚彼無內顧之憂動靜易聞我獲永終
之吉等因到臣隨據按察司呈同前事案照先據周
津甘文紹稟稱便手王武王昌并手下二十餘人出
官聽撫已經宣示恩威嚴加省諭及行道府犒賞議
處去後今呈前因臣看得王武年始二十一歲兵僅
數十餘人徒以粗勇爲賊憚怯自知府劉璣撫恤之

厚周津其文紹羈督之勤重以鎮巡震懾之威該道
守巡王綸王純繼事同功讐服之至節嘗爲官獲賊
思免罪尤祗陷宿讐浮詞挾訴心懷驚沮迹類桀驁
急緩兩圖均若可諗功過兼使宜若可爲矧瑞賊乍
違乍順人無定心亦司府欲撫欲擒官無定信今王
武等既出就撫待之當誠久若重違取之亦易使隸
名于籍寄食于官非惟湏其實用抑且杜其他謀議
爲有見除照奉

欽依便宜處置事理案行各該衙門依擬施行外緣係撫
處兵便安戢地方并脩政本以弭大盜事理謹具題

正事體以別嫌疑疏

奏爲正事體以別嫌疑事臣近蒙

聖恩改都察院右僉都御史巡撫江西者俟

命怖惶俯躬跼踖竊念臣二親老邁百志衰頽供職兩年

乞歸五疏未蒙

俞允又有江西巡視之

差私心揣量此老馬末程也接喘交汗以盡報

顧復深恩尋脫馬羈未爲失計不謂僅踰兩月重荷

差除臣敢不知幸而知報哉但念巡撫都御史韓邦問出

臣訪奏同

旨批代似涉嫌疑情義未安昔宋臣朱熹劾提刑唐仲友
尋奪其命授熹熹不拜包拯劾三司使宋祁尋解其
職授拯拯不辭爲歐陽脩所彈謂蹊田奪牛豈得無
過整冠納履當避可疑其於朝廷所損不細臣事迹
實類此臣敢不以熹爲法拯爲戒者哉且江西事劇
非他省比邦問才識非臣比邦問巡撫不稱更繁用
臣所謂一蟹不如一蟹者也臣往以更繁代張撫後
効竟不及撫今又代邦問後効豈及邦問臣豈敢竊
虛美邀實累哉伏望

聖明曲垂憐處另擇才賢巡撫江西停臣別叙惟復容臣
照舊巡視完日歸老庶事體正辭受明無形迹之嫌
有肢骸之所不勝至幸緣係正事體以別嫌疑事理
謹具奏

聞奉

聖旨林俊不准辭著用心巡撫地方吏部知道欽此

災患疏

題爲災患事據江西布政司呈南安府申大庾縣老人
甘文瑞等呈本縣城市鄉村軍民男婦自弘治十六
年正月中旬以來多感喉風腫毒急證辰病午死或

即時死或在市買賣入門即死一家三五口者有之
六七口者有之男女豆疹死者不可勝數家家遍染
前災上猶縣老人李清秀等呈自弘治十五年十二
月以來本縣坊廂龍下童子等里耕牛猪畜沾患時
氣俱已災死今年正月初旬市井村團軍民多感風
痰咽喉急證朝病暮死全家遍染湯藥無人葬無虛
日悽愴驚惶呈乞急救等因備申轉呈前來查得先
據該府申前事已經行令發粟拯濟官備藥餌多方
醫治貧無棺木量爲措置去後今呈前因臣看得江
西司衛府縣庫乏存積銀兩倉少預備稻穀俸糧歲
欠八萬四千餘石物料歲欠二萬二千餘兩瑞州之
強盜稍息南康之飢民又起左按右遏東出西沒今
南安災肯盛行老稚卒中或一家俱病或數口俱死
下至牛畜俱各被災是皆及身之切禍非垂象之隱
然雖令乘時發粟施藥給棺終爲無財所窘況南安
又與韶州惠州汀州郴州等處相連萬一流賊乘虛
爲患非細臣技窮當局憂切涉冰除再行守巡兵備
等官嚴加提備及督屬辦藥措棺處置牛具賑卹脩
省外緣係災患事理謹具題

知

查報擒獲盜賊爲各官開俸疏

題爲地方賊情事據江西布政司呈准本司分守南昌道右叅政王綸咨自弘治十五年正月起至弘治十六年三月十二日止督據南昌道所屬瑞州等府捕盜通判等官甘文紹等陸續獲過各起強盜并窩主賊屬共六百四十四名口瑞州府獲過強盜四百八十三名窩主五名賊屬一口南昌府獲過強盜一百五十名窩主一名賊屬四口并原帶管湖西道所屬吉安臨江袁州等府共獲過強盜一百零四名等因到臣行間又據江西按察司呈准本司分巡南昌道僉事王純關同前事查爲地方緊急賊情事該鎮巡等衙門會案備奉

勅內事理查各衛所府縣掌印巡捕及三司守巡等官戴罪拏賊賊未盡絕不許支俸又爲脩政本以弭大盜事臣案行守巡等官督屬將未獲賊犯設法挨拏務令盡絕去後今據前因臣看得江西各府盜賊瑞州爲多自奉

勅切責之後鎮巡官牌催案督寢不敢寧守巡官王綸王純守併坐臨勞不敢息知府劉璣周津捕盜通判甘文紹叅籌授算智取力攻及掌縣事通判施堯臣知

縣童旭謝樞巡捕主簿劉銘潘崇典史胡冕等亦各畏威供事以致惡魁兇黨次第成擒是皆

陛下神威聖武諸司効命之攸致也臣至之時賊已衰謝及今似乎少康雖狐遊鼠出迹難盡除而蟻聚蜂屯勢難遽盛除將各犯先已問結及後獲行審無冤問報未獲仍行緝捕務期盡絕以靖地方外所據各官并賊少地方官員俸糧似合暫容一體關支以作其勤若各賊再縱另行區處緣係暫容支俸及地方賊情事理謹題請

旨

更調官員疏

題爲脩政本以弭大盜事據江西南昌府申本府所屬奉新寧縣俗野民頑訟繁事劇奉新縣知縣徐南懌弛遜悞寧縣知縣董壽鴛鈍迂徐以致糧料歲逋盜賊日縱吉安府申所屬永新縣刁豪旁午強竊陸梁知縣羅煥性頗近遲才非任劇南康府申所屬建昌縣知縣石琰邑事欠脩民心多玩局才具位養盜殃人俱合奏調事簡縣分別選賢能以舉縣政等因到臣看得徐南董壽羅煥石琰操存無害施置委疎矧丁紛結之期尤宜解紓之急及訪吉安府安福縣知

縣李如圭廣信府弋陽縣知縣王誥俱各年少性剛
疾惡太甚跡孤怨結預合保全如蒙

准題乞

勅吏部叅詳臣奏果有可采將徐南董壽羅煥石璫議事
簡縣分李如圭調建昌王誥調奉新其寧縣求新安
福弋陽四縣別選閭敏練歷廉剛有威進士銓註奏
取

聖裁給憑嚴限赴任庶官使得人政平訟理而盜賊自息
緣係更調官員及脩政本以弭大盜事理謹題請

旨

復州治疏

題爲復州治以制強禦事據江西布按二司守巡南昌
道右叅政王綸僉事王純呈據南昌府寧縣儒學廩
增生員戴邦哲等該縣里老陳淮等各連名具呈本
縣上接湖廣瀏陽下連武寧奉新靖安荒僻阻險人
民豪橫或招納強僕或養交俠客百十爲群軟盟自
結辯者構訟謀勇者習拳棒爭雄角勝執杖持兵殖
黨聚徒奪牛搶穀倚人命則屋舍爲墟誣賊情則雞
犬殆盡奏告連年身不出官糧里終歲足不到縣匿
卷案關已者百不一存邀公文提人者十無一到鄉

民被其吞食官長遭其謾罵近年以來尤爲尾大不掉滋蔓難圖是固地險之足憑抑亦職輕之易侮緣本縣舊爲寧州

國初改寧縣乞復州治以制強禦等因備呈到臣案查先據知府祝瀚呈前事臣拘滯成格止將該縣知縣董壽才力不及緣由

題行吏部議調未報今又各呈前因臣公同守巡知府等官親臨訪處縣在萬山之中陸多峻崖水多惡灘舟車艱虞上司不到喜爭好亂誌錄舊風陷吏抗官鄉黨常態委的民極頑梗縣難鉗束臣雖稍裁惡首未能終絕禍根如蒙乞

初吏部叅詳臣奏將寧縣奏復爲州官改別用另選風力知州等官管理庶職重易臨民乃可制緣係復州治以制強禦事理謹題請

旨

論寧府用瑠璃䟽

題爲酌大義以全賢孝事臣日者審

寧殿下累乞瑠璃瓦重荷

聖俞於引錢內支二萬兩給換者臣有以仰窺陛下聖仁廣大惇叙九族盛心而

寧王據禮守經不爲無見然觀鎮巡議奏欲俟年豐定奪是異言不當與也工部覆奏謂規制雖相應事體實可止又恐重累地方作例各府是正言不當與也迨

寧王又奏工部又執奏是申言決不當與也

陛下先可部議是明示不當與後從其半是婉示不欲與也士夫及耆壯公論謂

寧府多此一舉是中外人心皆謂不當與也

寧王讀書明理聰察識事斷不爲此必勝以損賢名偶未之思耳夫事有可爲有不可爲有可已不可已

江西公私匱竭人民滋困盜賊未息此何時也意者引錢無預於民不知存積僅二萬七千餘兩

益府宮殿蟻壘

益殿下見移東寢萬分驚虞責將誰任洧蓋之費約三萬餘兩此不可已者也

淮府造墳

順昌王

崇安王鎮國將軍起第已支五千三百餘兩後來未計此不可已者也所在儒學文廟傾頽問其故謂科罰例嚴所司顧忌不脩之致此不可已者也各處預備

倉穀數少問其故謂罰贖解部所司計無自出之致此不可已者也官軍俸糧通融節縮歲支尚少四萬四千餘石此不可已者也臣嘗見

楚府殿燬久未蓋

荆府多敝漏

淮府同一江西頽垣朽柱東拄西撐飄瓦斷椽脫落大半居然廢址在民庶尚不堪居住

寧府完美堅緻金碧燦煌夫大義不可已有可爲割財內帑爲之未過也有可已無可爲又何必爲此等事哉古者采椽不斷茅茨不剪土堦贊堯卑宮贊禹儒

服紀河間樂善紀東平湘州之約儉鎮西之輕貞聖

帝明王所以揚盛休聖後美者端亦在是

寧府移封之初

親至親也已不用瑠璃再造之會

國至富也又不用瑠璃豈亦慕采椽茅茨之盛崇古獨

質示樸以垂憲如此如此哉今歷百年傳數世一旦

無故而遽改之孝子順孫所以順祖考者義不當是

夫前之失後人尚諱之前之善後人忍改之耶改則

盡歿之矣歿之非孝子歿之非順孫謂

賢王忍爲之耶臣所謂偶未之思者也況性習難靜易

身素集卷之三
奏議
十一
動難儉易奢操之猶懼或放縱之何往不流

賢王春秋方盛德業方始求之身心自有專務而規規循常文具之間以毀礪前人法則臣未知其可臣數

侍

賢王言論多師法古又誤被禮愛獨至臣服深感切私亦當厚顧若無右於

賢王臣罪死罪死臣往年疏府第之制以不用瑠璃美寧先王義不當以用瑠璃諛

今王且小人先合後忤君子和不尚同臣欲愛德而義完賢名不欲貢諛順旨虧至孝孟軻曰齊人莫如我

敬王臣拘儒不識通變但知報

王道當如此竭忠盡愚事

陛下道當如此

寧王靜思幡悟必有創於臣言伏望

聖明篤懿親斷大義垂善處使

賢王德如純璧名若完甌毋涉吳王几杖之賜叔段京鄙之求正大明白恩不掩義爲世世頌美幸甚臣無任隕越俟罪之至緣係酌大義以全賢孝事理謹題

請

巡撫謝恩疏

奏為謝

恩事臣先官南京都察院

欽命巡視江西尋蒙

聖恩改官巡撫秉嫌引避

睿注莫回申

命式臨踧躬無措竊念臣性愚且戇超廁清銜跡孤以危

早投閑局意深銜木倦還轉負於初期病切思槽專

策顧申乎末路臣敢不仰酬

知遇懋聲謏庸審方今震撼之原脩近古懷柔之政庶使

江西之民頌

周風之仁厚樂

舜治之雍熙臣無任感激

天恩之至除望

闕謝

恩外謹具奏

聞

進繳巡視

敕書關防疏

奏為

進繳

敕書關防事節該欽奉

敕江西各府盜賊近來尤甚特命爾巡撫彼處欽此臣先
任南京都察院右僉都御史奉

敕提督巡江兼管操江續奉

敕巡視江西欽遵將提督巡江關防并操江文卷咨送該
院右都御史張敷華暫管臣離任前來弘治十五年
十二月十三日到江西二十六日巡瑞州又巡上高
巡新昌又巡瑞州弘治十六年正月十七日回省本
年二月初四日巡進賢欲巡撫州聞南康饑民群起

搶穀遂巡餘干巡饒州巡都昌巡南康地方已靖又
巡湖口巡彭澤巡九江巡瑞昌巡德安巡建昌巡武
寧巡寧縣巡奉新巡靜安又回奉新巡瑞州饒州饑
民又搶穀臣又欲巡饒州五月初六日經省城奉

勅命臣會勘董讓王哲事情留候給事中等官湯禮敬等
到同行 事催督守巡俱至饒州嚴加禁治一面賑
濟地方又靖其餘府縣未及巡歷荷蒙

聖恩改官巡撫除欽遵施行及將編定均徭里長稅糧等
項造冊另繳外今將原奉提督巡江兼管操江并巡
視江西

身...卷之三
奏議
勅二道原領巡視關防一顆具本差人齎捧謹具啓奏
聞

計繳

勅二道 關防一顆

水患疏

題爲水患等事據江西布政司呈准本司左布政使林
泮咨准本司咨據贛州府瑞金縣申據里老鍾永聲
等呈稱弘治十六年五月十四日以來霪雨不止十
八日早大雨如注已時分江水洶湧汎漲滿城田園
推成沙壩道路陷成深坑東門城樓城門俱各衝倒

預備倉穀儒學倉米淹浸一尺有餘週圍內外城垣
坍塌百十餘丈近河民房財物牲口漂流罄空故老
相傳自昔罕見又本年二月以來各鄉虎狼縱橫人
被傷亡不可枚舉至今人絕往來似此災異相繼民
不聊生等因備申到司又據本府龍南縣申本年五
月初二日起霪雨連綿山溪水漲至本月十七十八
日連被上蒙裏營西河三江洪水齊到又添大雨城
內水溢官民房屋儒學衙門有浸至屋簷有浸至四
尺預備儒學等倉街民房屋多被淹倒本縣監房儒
學公廨城垣衙門牆壁俱各倒塌至本月十九日方

止丈量得外城倒裂二十五丈二尺內城倒裂九丈四尺及據本縣坊五圖里老張崇等呈稱陡被洪水將大小陂圳各民所種晚田有水衝成湖有沙積成堆人民愁嘆等因又據本府會昌縣申本年五月初旬以來霪雨淋漓本月十三日起至十八日止晝夜驟雨洪水汎漲田禾多被衝淹城垣多致倒塌近河軍民房屋崩倒四十餘家况又連日北風寒如九月以致禾苗不秀等因各申到司案查先爲地方事據南昌府申據南昌縣申弘治十六年三月初七日民人涂寬家母猪生下小豬一十二隻內有一隻未分

陰陽一頭二身八足緣係怪異呈轉到司備咨到職會同江西按察司掌印副使沈銳議得贛州府所屬瑞金龍南會昌三縣俱於本年五月內被大水衝塌城垣淹浸倉糧損壞官民房屋推壓早晚田禾係干邊城民患合行脩理賑卹其瑞金縣傷人虎狼合行募捕南昌縣豕產怪異合行瘞埋將議處過緣由會案轉呈定奪等因到臣會同鎮守太監董讓巡按監察御史姜實議得江西地方盜賊稍息未絕人心粗定易搖其南安贛州二府俱係本省邊境重地先是南安屬縣已有喉病暴死之災近來贛州屬縣又有

大水漂沒之患况虎患作於邊縣豕禍見於省城考之漢臣蔡邕曰政有苛暴則虎狼食人文獻通考曰豕生八足下不一也凡此災異皆由臣等與有司不職之致臣等待罪鎮巡曷勝驚懼竊惟變不虛生事宜先慮除南安府災患先已具

題及案仰都布按三司各行所屬衛府所縣等衙門并臣等痛加脩省仍行嶺北道守巡親詣贛州府分段查勘三縣前項水患是實將城垣倒裂者作急脩理倉糧浸爛者搬晒賤糶其漂流房屋缺食軍民應安插者安插應賑濟者賑濟水衝沙壓田畝堪改耕者再種應申災者勘報衙門公廨墻垣傾頽損壞者斟酌財力漸次脩葺仍督瑞金縣招募捕戶將傷人虎狼多方捕打務使軍民安業地方無虞緣係水患等項事理謹具題

知

請復常平疏

題爲備糴本以復常平事臣聞古無常豐之歲而民不患於不給無他積之有豫也夫民司命者官而恃以爲命者穀穀不積民有衣寶玉而死者矣故預備之計於民最急今江西所屬預備倉穀湖口縣不及一

千石彭澤縣不及六百石石城縣僅二千有奇泰和
大縣亦僅八千有奇其餘積蓄俱少臣竊憂之夫凶
則散豐則斂官府常窺散則樂斂則怨人情大致詭
名冒領造長市道之奸抵斗追還竟諧里老之計公
催稍急則交扇互搖巧呈哀訴只得停止以致數縮
于官有出而無入約爽于民有借而無還出非原泉
還非神鬼伊何能繼今欲公私兩便惟有常平可復
而已查得近例一里約積穀一千五百石江西衛所
姑未槩論試以有司言之六十九縣總計一萬一百
四十五里穀以一里千石計之尚該一千一十四萬
五千石見在所積十未及一約少九百萬石每穀五
石作銀一兩該銀一百八十萬兩盡括司府庫藏不
盡一十萬兩糴本羞澀力難求濟是外非重罰罪不
則勒勸大戶取彼與此仁者不爲况今法日以弊
開勸罰之門義日以衰難求輸助之戶若棄是不致
則今年直小荒耳待哺嗷嗷聚群搶穀南康起九江
起饒州又起熄之復炎痛之而無畏萬一荒耳無
尤甚者乎是正謀

國所當預處者也宋仁宗時嘗出內庫百萬緡以助糴
本今日

內庫臣未敢知若承差吏典納銀之例又妨政體彼等之法冠帶尚義猶可行耳伏望

聖明軫念江西爲控扼楚蜀閩廣擁護

金陵要地人民凋瘵之餘

岫仁加卹

特勅該部計議奏行布政司招納義民官一千名除問革官吏外不拘本省別省客商軍民舍餘老疾監生廩增附學吏典及子孫追榮父祖各聽納銀七十兩者授正七品五十兩者正八品四十兩者正九品各散官二十兩者冠帶榮身監生減十之三廩膳減十之

二陸續填給收完銀兩分俵各縣以資糴本各該冠帶雖不免其差徭亦用加之禮貌毋妄點罰毋輕差遣使絕陵轢樂於順從其不願冠帶願立表義牌坊者若出穀二百石亦容蓋豎不限不停以補官乏臣又見凡問口外爲民邊遠克軍罪囚或逃而不去或去而即逃徒名治奸無益事實乞

勅法司計議除情重外如扛幫誣告強盜人命不實誣告十人以上因事忿爭執操兇器誤傷傍人勢豪不納錢糧原情稍輕不係巨惡叅審得過之家願納穀一千石或七八百五六百石容其自贖免擬發遣其誣

告負累平人致死律雖不摘情實猶重并窩藏強盜
資引逃走抗拒官府不服拘捕本罪之外量其家道
勸穀自五百石至一百石以警刁豪俱由撫巡參詳
無容司屬專濫臣仍與巡按督併二司專責守令於
囚犯紙米并應追贓罰工價逐旋存積務取數足爲
期不容分外科罰如縣一十里則積一萬石二十里
則積二萬石糶本精選該縣行檢富戶量力領買上
上六百石次四百石次三百石又次二百石不許市
民公役冒領侵費專厥收受名曰常平如秋成穀賤
六石糶入春夏穀貴五石四斗糶出秋成五石糶入

春夏四石五斗糶出每石明扣一斗以備折耗存積
俱今社長社正開報貧民每丁止買二錢以杜兼利
前項銀兩當令前該富戶給領秋成照價糶入穀貴
依前糶出循環如常若穀賤年分不必發糶仍別查
弘治十四十五十六三年放過饑民稻穀量過一半
如借一石者追五斗另厥收受審實極貧倍加賤糶
如時一錢四斗則與六斗果甚孤獨無歸委難自糶
方與賑濟不必追還若得過冒領問罪之外每穀一
石罰穀十石衛所常平亦依此法衛一萬石所二千
石爲則各該掌印有司考滿叅定殿最軍職管事酌

取去留所貴上下相資人法並任同心遠大之圖用
復常平之政臣再勸社民各立義倉與義學義塚例
置名曰阜俗三義盡一義者書一義之門二義三義
稱是義倉之畧社中富民任其出穀六百石或四百
石別處一倉極貧利一分次貧利二分春借秋還轉
相調助民樂表異似亦有從若常平既復社倉又行
則饑饉有備而地方可保無虞此預備至計子民至
急而江西今日尤爲急者伏惟

留意臣不勝大願緣係備糴本以復常平事理謹題
請

均平稅糧鹽鈔疏

一題爲脩政本以弭大盜事據江西布政司呈准本司左
布政使等官林泮等咨抄奉巡視案驗照得弔查坐
派糧用頗屬均平但地險遠者利輕齋地近便者利
本色尚踈適事之宜私其民者曲申請私其鄉者妄
奏豁未杜搖言之惑折色改通派尚庇專利之家五斗
撥存留顧長洒糧之弊歲用不足須別通融歲納愆
期須申則限况免淮南祿存折名項數多鄉民難於
備曉糧里易得藏奸又戶口食鹽錢鈔起解有定額

身素集卷之二
奏議
徵收無定丁尤便縮伸影射之謀欲燭幽微須立簡
易看得左布政使林泮管糧左叅議黃皞慎密老成
合委編派仰抄行各官即將所屬稅糧從公定派何
處便本色何處便輕齎何處無害重難何處須加輕
省寓足用之法定徵納之期除官米照舊折色外民
米不拘官戶民戶米多米寡通行扣筭起運項下免
軍南淮折銀折布存留項下

親王郡王祿米軍衛有司學校俸糧俱以一石爲率細
扣某項正耗各該銀米各若干會總若干每石總扣
各該銀米各若干止作二項填寫由帖使人戶據總

而出糧里分類而納應自運者仍自運應糧里者仍
糧里俯從民使仰給公輸食鹽錢鈔除老幼殘疾免
徵外實在丁口選的當府官或風力知縣通查某縣
某圖某戶丁口若干通該若干寫定花名數目將該
縣額解錢鈔通扣該用若干丁口可足若有餘剩孤
貧及下下戶量與省免毋容市民大戶用幸造定徵
冊照丁催徵五年一次改造寓消耗於省口隸歸一
於限年庶官存原額民感寬征補物料之重以紓民
力之困其徵收解戶將見年里長丁糧最上之家開
具大縣八名中縣六名小縣四名各註畧節行檢申

布政司於內點僉大縣四名中縣三名小縣二名候
下年管收不許勢豪私囑公役陰圖市民幸保完日
通解布政司類解中間若有未盡宜從徑自叅處使
一弊不留官民兩便等因備抄移咨到職案查節准
本司咨奉巡視案驗批呈俱爲坐派稅糧等事已經
遵奉查派造成草冊繳報今准前因會同將南昌等
一十三府南昌等六十九縣稅糧除官米照舊徵收
折銀外其餘民米不分官戶民戶糧多糧少俱照各
色則例一體均派若縣分富庶及舟楫可通量撥重
難縣分貧難及舟楫不通量加輕省其銀米加耗及
車船雇脚盤剝搬運等用厝咨詳處條析類合逐一
扣編由帖具式行註俵散使人戶據是而出糧里據
是而徵官司據是而考其欠納過徵之弊其各縣戶
口食鹽錢鈔徵收事則亦就各該稅糧冊後備開明
白令其遵照今將弘治十六年并弘治十七年以後
年分派徵稅糧文冊造完咨繳等因備咨轉呈到臣
案照前事該臣巡視江西節該欽奉

敕江西盜賊之起委由賦役不均官司坐派稅糧等項往
往循情畏勢陰佑巨室貽累小民以致窮困無聊相率
爲盜爾須悉心訪察痛革弊端務在平徭均賦以甦小

民困苦欽此欽遵已經行委各官會查編派均徭去後
今據前因會同巡按御史姜實議得立法救弊莫貴
乎始之詳詳則節目易見又莫貴乎終之簡簡則綱
領易知今各官林泮黃皞會處前項稅糧鹽鈔本折
例派既以杜飛洒之奸存起地方又以避險夷之便
以正數兼耗費以一石例升斗總收類納條理可尋
上賦下供毫粒無爽而由帖分散家喻戶曉糧一石
者即知該納米幾斗銀幾錢糧一斗者即知該納米
幾升銀幾分過其數則爲糧里多徵不及其數則
爲人戶欠納存留兼派本折積歲餘以補歲用之缺

子粒先儘衛所核歲實以杜歲納之虧至於鹽鈔扣
足額則虛冒莫售其奸丁口審量免則困窮重蒙其
惠數具成冊用革濫徵解選良民潛消侵囑他如起
運輸納之期里運自納之便因事立則摘隱發幽若
刻實寬若繁實簡誠爲官民兩便其周防剗抉不過
奸汙官吏糧里私蠹而已持而循之人戶所省一年
約銀五六十萬但壞於貪冗則盡廢毀於異同則中
更又非今日所能預料合無准照編定均徭里甲事
則行布政司將前冊騰發南昌府支給官錢雇募翻
刊印刷送司鈐記每府縣掌印管糧各發一本仍令

各府自備紙劄將凡例并該屬縣分稅糧鹽鈔則例
刷印回府鈐記發各糧長一本俱相承收照其人戶
願自印者聽從其便使則例廣傳上下通曉而宿弊
一清其弘治十六年稅糧坐派已遲合暫行屬依派
其弘治十七年以後俱候奏

請定奪再照江西左布政使林泮清而苦勞而謙晦密慎
勤超絕倫類左叅議黃皞謹實明亮克稱才猷其編
派稅糧鹽鈔可謂竭盡心思而推筭筆削之勞皞尤
任之故臣得藉手塞責伏望

明特

敕該部詳議具覆乞

賜裁處頒下遵行使小民均惠而臣等任怨亦爲不孤若
行之年久又有應正事宜務經撫巡議

奏以杜吏奸林泮黃皞量加旌擢以勵官能緣係巡視
節該奉

欽依務在平徭均賦以甦小民困苦及脩政本以弭大盜
并勵官能事理未敢擅便除行江西布政司備造

奏啓文冊徑自奏繳青冊呈送戶部查照及將平徭役
另本具

題外爲此會本謹題請

均平丁糧徭役疏

題爲脩政本以弭大盜事據江西布政司呈准本司右布政使柳應辰咨准本司咨奉巡視案驗據本職并江西按察司副使沈銳呈送定處過均徭里甲草冊到院看得凡例簡嚴條議周悉但編派均徭丁糧處置里甲銀兩雖云濫設加汰而省若未多缺額盡填而徵猶過重民難慮始法在圖終欲垂永久更在精詳仰抄案回司即行原委官員將發去草冊再行查議改過各項總數條件再行查筭編補均徭銀兩再

行酌處廩給庫子弓兵名數先賢忠臣等祭祀查明增損其餘可革可因從宜審處作急完報等因備咨到職案照前事咨奉巡視案驗行據南昌等一十三府掌印知府等官祝瀚各親齎查過縣屬丁糧里甲均徭揭帖前來查審差有銀力而均徭混編里有大小而煎銷槩出田不論等利倍而同科戶不論則富懸而例派况大縣四五百里小縣五六七里大者差迤增而猶輕小者差迤減而猶重不差五斗以優下戶顧起洒糧之奸第免雜差以優仕籍顧藏寄籍之託必欲一清宿弊須在深計熟籌除量加去取省令

各官執帖前來外看得布政司右布政使柳應辰按察司副使沈銳精練老成擬合選委仰各抄案回司即行各官別擇寬靜去處令祝瀚等會聚交謀同仁均視合各縣以通融盡一方之繫矩所損所益務當務均議定回府各官逐旋會查某府某縣歲派里甲原額若干不論里大小家貧富止憑丁糧定派人一丁若干糧一石若干使如原額扣定額派弓箭弦條并祭祀鄉飲孤老等留縣支用其餘盡數解府類解布政司編附流水號簿將歲派黃白蠟皮張等項一應物料并戶禮工三部近年加派通約可勾若干尚欠若干應於均徭編補又將某縣歲編均徭解戶柴薪皂隸弓兵巡攔斗級門子庫子館夫馬夫渡火防夫鋪司鋪兵等項銀力各幾差力差折估與銀差通該若干又將進

表須知科貢盤纏牌坊勻派通該若干一縣一府一省分計總計并補物料共該若干方將各府丁糧除事例應免之外糧不分升合并假託寄莊俱田分三等高者重出低者輕出了兼論事產并同籍異門俱丁分九則上上重差下下免差又如九江南康等小府星子瑞金等小縣力差尚難銀差應爲別派吉安饒州

等大府豐城鄱陽等大縣銀差尚輕物料應令編補
撫糧輕而田濶派多不過袁糧重而田狹派寡非偏
府縣正佐柴薪馬夫別派以別官嫌司屬大小力差
近編以從民便樽量三年五年一編之處默符十年
一編之差先以凡例次以額數又次以編審徵解存
留編補使鑿鑿可考永遠可行務盡逐年之丁糧僅
勾逐年之差使毋編餘剩以便侵漁此外別有相應
宜從徑自增損等因備咨到職已經會同於永寧寺
寬靜處所督同知府祝瀚等查議均當就令回府各
職仍於本寺逐一遵照案驗事理將均徭丁糧通融

編派里甲銀兩酌量查處類造草冊繳報云後今准
前因催據南昌等府將各驛廩給庫子巡司弓兵等
項可增可減名數并先賢忠臣等祠祭祀名項各開
報前來會同按察司副使沈銳再將發回草冊逐一
查議除遵照改定編處外其濫設重徵未盡汰者汰
之未盡減者減之并他可增可損可因可革逐一酌
處惟求省費兼取便民今將定處事宜類分條例其
類有五一日編派查處凡例計五十條備載沿革
及查處編立革弊則例二日編派均徭條格計
條備載差役總類欸目及編派優免則例三日編派

均徭定額計六十九縣總爲一條各分其目備載差役名項及丁糧派銀編差編補料價定數四曰查處里甲銀數計

條備載各縣額派弓箭弦條祭

祀鄉飲孤貧布疋有無勾欠及酌派足用定數五曰預計坐派料價計

條總查均徭里甲派撥編

補以備坐派物料定數夫條格所以揭定額之綱定額所以著條格之目查處所以立預計之體預計所以實查處之用條格定額皆爲均徭而設查處預計皆爲里甲而設凡例則總括四類而領袖貫通其間者也均徭里甲立則大要如此若奉行得人則徭役不累偏差里甲不憂重派乞爲詳擇發屬遵行使有司守畫一之規小民解用三之困等因造冊咨繳到臣案照先爲前事該臣巡視江西節該欽奉

勅江西盜賊之起委由賦役不均官司坐派稅糧等項徭徃徇情畏勢陰佑巨室貽累小民以致窮困無聊相率爲盜爾須悉心訪察痛革弊端務在平徭均賦以甦小民困苦欽此欽遵已經行委各官編派續據呈繳草冊前來又經案行再加詳處去後今呈前因會同巡按監察御史姜實議照官有庶役國有常供勢不可缺而取必在民然非有以均節之於力必困財必窮而

人心必失今日江西之盜職非由此者耶幸逢
聖明量包

天地怒震雷霆醜類革心渠魁授首耄孺蘇息欣際少康
然悠久之計根本之論則平徭均賦毋復餘矣臣等
仰宣

德意慎付官能除稅糧鹽鈔別委幹理外而均徭里甲既
合各府之長復重二司之託惟欲經畫

國計解紓民隱今柳應辰沈銳處編造繳寸量銖較縷
析毛分盡一年之丁糧定一年之差使叅之戶則田
則定以銀差力差杜飛洒則見糧有差杜餘剩則補

料有數杜妄費則進

表須知科貢盤纏牌坊有定額縣有大小而輕重默符年
有疎密而勞逸默運格目具而混淆以清額數定而
名銀可考以縣視縣而一府均以府視府而一省均
固不涉違道以虧公亦不專庇貧而抑富一年而論
差約減二千四百餘差銀約減四萬七千餘兩其量
除丁糧優免官吏生員等家并貧難極下人戶丁計
八萬一千餘丁糧計四萬九千餘石則又不在編差
之限而均徭比舊輕矣里甲均見年丁糧而出則里
無大小人得其平按舊額出辦而徵則銀無增損官

持其要先儘額派軍需物料祭祀鄉飲孤貧則存留
定數易查其餘辦料并均徭補料銀兩類解使司流
水附簿則起解定數易考人民難於拖欠官吏難於
侵沒物料分類齊解上得實用事整而不見其勞解
戶因類總僉下無重擾事約而不涉於濫在官所減
雖無定數可稽在民所省約以數萬爲計則里甲比
舊輕矣至於各項罷行之法槩可揭查通融殫乎心
力因革契乎事宜詳而可見簡而易知其澄弊大致
在杜絕官吏恣濫僉存餘剩多徵盜費而已但任法
不如任人固難保奉行之皆至如阜隸馬夫自私者

或不利於調派坊牌盤費要譽者或輒擬於加增
法必更而民必加病至他異同亦非今日所能逆知
者也合行布政司將前冊騰發南昌府支給官錢雇
募翻刊印刷送司鈐記分送鎮巡按察司并守巡各
道及分發府縣各一本相承存照各府自備紙劄將
凡例并該屬縣差額等項印回鈐記逐年轉發編審
均徭里甲官員查照人民願自印者聽從其便使則
例廣傳上下通曉宿弊一清其弘治十七年均徭里
甲編派已遲合暫行屬依派其弘治十八年以後俱
候奏

請明文定奪再照江西布政司右布政使柳應辰廉慎公
勤政事精練按察司副使沈銳謹密沈敏刑名深歷
其編派均徭甲可謂細入毫毛而比類分條之勤
應辰尤任之故臣得以因人成事伏望

特勅該部詳議具覆凡定過一應差徭調解補料不許一
役濫僉一事改派一丁一合餘剩一兩加添其盤纏
坊牌名目兩數之外牌坊除官府壯觀損壞脩理外
其餘俱係一時作興不許再作人情脩理違者官作
不謹罷免受者坐贓治罪庶政例嚴一風清弊絕而
為

國為民任怨亦為不孤其柳應辰沈銳伏乞量加旌擢
以勵官能緣係巡視節談奉

欽依務在平徭均賦以甦小民困苦及脩政本以弭大盜
并勵官能事理未敢擅便除行江西布政司備造
奏啓文冊徑自奏繳青冊呈送戶部查照及將均糧賦
一事另本具

題外為此會本謹題請

旨

守制乞免關勘合疏

奏為乞

恩守制等事臣罪疊盈積禍延臣母今年七月二十八日
在家病故八月十五日計聞五內分崩攀號慟絕臣
出二年乞歸五疏亦預虞在此也今臣母不可作矣
臣父今年七十有四久患風疾重罹哀感事切可虞
臣質弱服勞遭此凶變疾疢轉亟血氣乾枯手足風
痺神魂散失要亦旦夕間人即欲匍匐就道關領勘
合緣已不能動止誠恐客死於外臣既誤臣母不無
又誤臣父雖切報
國之心將亦與身俱滅伏望
聖恩矜憫乞

初談部查臣前後奏疏容臣住關勘合回還守制兼侍父
湯藥臣倘前病不痊服滿容臣致仕臣死生不勝感
戴

天恩之至謹具奏

聞弘治十六年十一月二十一日少師兼太子太師吏部
尚書馬

題奉

聖旨林俊著照例守制欽此

回話疏

奏爲乞

恩認罪回話事臣准刑部咨備該部題爲欺慢
朝廷失誤

慶賀事談

寧王奏弘治十六年七月初三日恭遇

萬壽聖節

慶賀官員數少點得指揮等官吳漢等三十六員生耆
吏典張璽等五百一十七名不到叅奏提問及叅臣
不應先於本年六月二十七日日出巡乞降

勅戒諭等因奏行談部擬查臣果有無故迂避情由徑自
奏

請具題節談奉

聖旨王所奏林俊事情着他從實回將話來欽此欽遵備
咨到臣

天威下臨魂魄飛散方裂肝而灑血尤叫

天以望憐踈妄罪浮輸情敢隱臣聞各省凡遇

慶賀惟三司掌印官會城行禮鎮巡守巡公差等官隨
在行禮非不欲俱集省城或事勢不可緩或地方不
可離往逐旬月爲誤非細又別省巡撫或可安坐遙
制江西適當多事臣節該欽奉

勅江西賊情重大爾至彼設法撫捕務令盡絕江西各府

地方盜賊成群肆行劫掠毒害善良近來尤甚特命爾
巡撫各該府縣時常往來巡視欽此欽遵臣感激思奮
為

國分憂期盡歷郡縣盡掃兇賊以紓民急以仰答

上恩瑞州最急則巡瑞州撫州次急又巡撫州取道建昌

益王殿下發進賢遇南康九江饑民搶穀報至遂由饒

州趨南康九江順巡南昌屬縣又巡瑞州聞饒州搶
穀又起撫州賊又作臣又趨饒州道省城欽奉

敕勘事督催守巡先赴又督府所掌印巡捕立限緝拏又

委知府指搵四撫會捕臣留督拏奉勅越獄南昌豐

城建昌劫財殺人等強盜條災異預備等章奏均從

里甲稅糧鹽鈔等事宜屯田等案驗發粟以賑民饑

賤糴以平米價接審訟獄舉行社約禁導風俗政務

甫隙即同清理屯田給事中湯禮敬監察御史張津

員外郎趙履祥俱於本年六月二十七日出巡臣在

撫州行慶

賀禮又由建昌朝

益王殿下盡歷屬縣又踏勘長寧縣治又由饒州巡浮

梁忘寢食觸虎豹犯風濤假晝夜之驅馳易日力以

身素集卷之三
奏議
理事甫八閱月巡八郡三十七縣賊多之地或再至
或三至或住七八日或十餘日險僻山縣自來不見
巡撫守巡罕至臣皆親蒞吳城毛竹山弘山等處賊
巢臣憑仗

皇靈單車深入宣示

威德或草宿荒舍或五鼓抵城積苦服勞鬢髮盡白猶以
不能安地方副

陛下任使爲懼臣豈容頃刻圖安即粗迹之瘁勤驗素懷
之忠愛恭遇

聖節實切懽欣齊三祝於嵩呼特萬私於

天保臣豈敢無故迂避又隨在行禮故事具存湯禮敬等
三人是日同出似亦有據但

寧殿下素負賢名好古下士臣未至江西荷蒙

吹譽既至荷蒙

優待加常臣感激受

知亟圖愛助而自安率直竟涉猜嫌猶蒙寬假僅

請戒諭

陛下憐臣螻蟻未即行誅容臣自實臣悔罪服辜實當萬
死不勝戰慄怖恐之至緣係乞

恩認罪及節該奉

欽依從實回將話來事理謹具奏

聞

申明處置地方疏

奏爲申明處置地方事臣聞地有遠近故治有詳畧以天下言中國近而外夷遠也故治詳中國而畧外夷以一方言內地近而邊域遠也故治詳內地而畧邊域蓋詳可以制畧而畧斷不可以制詳治之勢亦治之體也江西原無專設巡撫後因南贛二府與湖廣福建廣東三邊相連流賊構患議設都御史贛州居住控制三邊其職專在督捕盜賊填安疆陬非若巡

撫軍衛有司錢穀兵馬刑名徭役學校農桑吏奸民隱皆其職也前于此江西之沿革韓雍閔珪均有可觀則巡撫之驗也後乎此贛州之處分金澤亦有可觀則提督之驗也其後金澤改江西巡撫仍督三邊便見踈越韓邦問繼之又見踈越積忤召尤竟爲言者所劾此畧不可制詳之明鑒也三邊流賊出沒無時劫縣攻城乃其常態既控三邊勢不得不住于贛隔江西千百餘里聲息往返動經半月臆度遙處豈能猝中事會顧彼失此勢難兩兼更欲旁州僻邑歲時週歷宣

上恩汰官弊親問民所疾苦又甚難者臣觀湖廣之鄖陽
控河陝諸邊故湖廣之巡撫鄖陽之撫治毋害並置
而山陝之榆林寧夏大同宣府各有巡撫提督均是
意也以臣愚見都御史不預巡撫專令提督三邊贛
州居住江西歲差南京侍郎或都御史一員更代巡
視務在遍歷宣示

恩德察覽風俗興革利弊事安奏停使詳畧相宜各便行
事如蒙

准題乞

勅該部覆議可否奏取

聖裁緣係陳言處置地方事理謹具奏
聞

辭免再起江西巡撫疏

都察院右僉都御史臣林俊謹

奏爲乞

恩辭職致仕事臣准公移荷蒙

聖恩陞都察院右副都御史巡撫江西及臣前疏辭免行

取乞

容致仕又不蒙

允者自

天有命無地措躬伏念臣起自諸生誤承
驅使清階數轉感

恩遇之已踰小力重煩念身衰之獨早自爲按察使即已
嬰心骸骨委分林泉矣幸際

聖明垂仁棄物我

孝宗屢有起廢之命我

皇上又有收召之恩今又有此遷除兼起視事臣非木石
豈不深加感激而思效涓埃哉緣臣始末本懷屢亦
具見辭疏臣父近尤耄耗臣近尤衰頹風濕轉深痲
瘡間作視昏聽重體弱神疲在情事既如彼在精力

又如此加以江西地方即今多事尤非病廢可支徒
深假退求進之嫌無切徇名責實之望臣揣微分難
冒顯融如蒙伏望

聖慈俯察哀懇追回右副都御史

成命容臣舊職致仕以養臣父終餘年

特勅吏部別推賢能奏充巡撫臣無任感激求憐之至具
本該通政使司官奏奉

聖旨林俊屢引疾乞休情詞懇切准致仕吏部知道欽此

見素集卷之二

見素集卷之三

本館所藏書目官奏本

林文舉代奏乞林計隨邊世世難甘吏得吸政後地
本館所藏書目官奏本

命孫引勸離文出以養耳文舉初年

文四州時以山西州人時今多事亦非前朝所

見素集卷三

後學黃佐 校正

族子 富 編集

後學柯維騏重校

孫男 及祖重梓

奏議

西征稿

預處地方容令致仕疏

欽差巡撫四川等處地方都察院右副都御史臣林俊謹

奏為乞

恩選任風力預處地方容令照舊致仕事正德五年二月初一日節該欽奉

勅近來四川地方盜賊縱橫今特命爾巡撫兼理松潘安綿建昌等處邊備撫安兵民如遇寇盜量調官兵民快相機勦捕陝西漢中湖廣荆襄等處交界地方流賊出沒遇有警急亦宜發兵應援星馳前去以紓朕西顧之憂欽此欽遵本月初四日又節該欽奉

勅四川流賊劉烈等四出搶掠侵入陝西漢中西鄉縣等處地方殺人劫財僭稱王號勢漸猖獗誠恐愈難撲滅今特命爾親詣夔州一帶選委謀勇官員統領官軍民快相機截殺或搗其巢穴或離其黨與或出奇制勝黏蹤追襲鄰境交界之處或有警急互相策應一應錢糧軍馬等項便宜區處務期克獲以收全功欽此欽遵聞命怖惶感深有泣仰

天自誓義不與此賊俱生謹遵吏部題

准伍日嚴程於本月初五日輿疾上道兼程前去外切念臣先在雲南感患風濕在湖廣轉加沉重自此因疾累疏乞休正德元年十二月奏奉

聖旨林俊屢引疾乞休情詞懇切准致仕欽此欽遵臣猷畝餘年皆

陛下之賜也近因父憂致毀風氣日深衆疾交作無十日
不病無十日不藥耳重目昏脚痿齒脫精神毫無臨
事健忘許

國朴忠抱素心於葵藿嬰身宿疾逼暮景於桑榆竊恐
計乏萬全術疎三畧辜負任使致誤地方未免煩

聖朝西顧之慮伏望

皇上

天地之量

日月之明爲地方至計

特勅吏部另推精力才智官員

簡命前來代臣巡撫遵照分定地方相機策應撫捕盜賊
容臣照舊回籍致仕以終殘喘不勝感懼求憐之至
謹具奏

聞奉

聖旨吏部便看了來說欽此該本部題稱本官素負重名
年力正堪委用且聞

命就道日兼數程大臣器度濟急才識即此可徵所據陳
乞致仕難以准理等因奉

聖旨是

通江捷音

題爲捷音事伏以苗民弗靈虞帝陳兩階之舞徽狁孔
而異用也

皇上出震嚮離握乾撫泰

重華不冒於六合群醜偶縱於三巴流賊藍廷瑞駝本
恕等烏合數萬盜竊名器紅巾扇焰赤地爲墟

皇上宅以至仁包之大度而彼頑弗率愈沸愈騰

皇上軫念民恫兵不可已

命總兵官毛倫視荆南都御史黃寶視關南太監羅籥視
川之東北

廟筭周悉比臣起廢視師則羅籥與御史陳鍾左叅政曹
祥僉事李恕已奏川東之捷羅籥又與御史俞縉布
按二司左布政使高崇熙按察使丁養浩等經紀兵
餉御史胡珣方德懋陳祥叶贊成事曹祥李恕守東
達以斷走寧之路都指揮僉事徐繼僉事郝綰知府
邵蕢守廣利以斷投番之路左叅議黃瓚僉事錢朝
鳳署都指揮僉事陸震駐兵通江大小關隘把扼無
遺分畫已定而尚書洪鍾近有總制之

命藍璋近代黃寶毛倫近有水寇之捷軍聲益振臣異懦
迂生深勤撫議而賊跡豺斂賊心狐疑毒熱薰蒸疫

痢大作病死逾萬食盡勢窮脅從日以解散賊老人
四十八營舊黨聚哭分爲二支藍廷瑞與最惡廖惠
等一支擬據保寧鄆本恕巴州李老人等一支擬據
漢中攻鄖陽由荆襄而下正德五年六月通江孤城
山水衝塌臣亟促脩砌兵火之地雇募無人預虞有
變連發四支之兵本月二十日一支先到本月二十
一日廖惠等果來劫縣倉卒輕敵致入破城錢朝鳳
陸震指揮郭敦知縣魏應時等隨即逃走賊殺人放
火當有公差官兵回縣賊疑救兵相率回營縣治學
舍倉庫分司未動賊被兵夫在陣殺死六名高橋紅
崖等處分路射死七十三名生擒二名逐趕淹死五
十四名奪獲騾馬一十頭匹賊殺兵快一十五名市
民四十六名口本日接管分守左叅議公勉仁帶同
二支之兵將至通江聞變退回又遇三支四支之兵
又行退回屯駐右垵臣復發儼回石砦等兵節督公
勉仁前進會同錢朝鳳犒新兵收散卒勵以忠義示
以必死儼回石砦激發先赴本月二十四日公勉仁
方離右垵本月二十五日謀報賊至錢朝鳳驚跌水
溝陸震驚失心俱尋走計鄉夫抗聲大義錢朝鳳愧
止本月二十六日辰時賊併力謀據通江坐食倉糧

不意我兵已振錢朝鳳烟燉一陣儼回箭無虛發賊
總甲王三等九名應弦而死兵夫乘勝敵斬一十五
名跳崖跌死一名餘賊敗衄本日午時公勉仁之兵
復從廟埡子架梁連闔數陣射殺八名擒賊老人廖
光子賊總甲高保兒等五名本月二十七日錢朝鳳
又遣儼回石砭鄉夫助陣龍灘河偶漲賊賣踪過灘
機正可乘公勉仁擁兵不追儼回鄉夫奮勇追趕殺
死賊總甲王法林王月林王月聰王四王五等并生
擒跳崖跌死淹死自本月二十一起至本月止共
計擒斬八百四名口跌死五百九十四名口淹死五
百五十七名口沉水漂流不計其數奪獲騾馬七十
五頭匹續調儼回標手又到又發知府張敏何珊統
領同指揮曹昱王英知縣李相率同鄉夫前追本月
二十九日張敏追至門鎮子直扼其前兵僅千餘賊
幾二萬連戰二陣本年七月初一日又戰二陣俱捷
賊探兵少商量要包我兵赤身散坐石砭三千餘兵
背馱後至誤入其營被賊圍殺石砭殺賊一十一名
賊殺石砭八名傷九名石砭走出復入張敏營內賊
方來闔何珊等兵會鄉夫林集各賊畏懼藍廷瑞一
萬餘人賣踪先奔紅口廖惠等七千餘人殿後拒闔

張敏兵分爲三橫衝賊陣何珊等兵爲後應各賊披靡乘勝追逐殺死人馬重疊落崖三條溪溝俱滿大溪十里流水俱紅錢朝鳳兵亦尋會殺死賊老人廖麻子麻六兒饒老人李老人冷老人并藍廷瑞廖惠妻及搜山擒斬自縊自六月二十九日起至本月止共計擒斬八百七十一名口走回被虜男婦六百餘名口殺落溪溝張敏等追賊不及查數老人馮進英等報約有三千餘人本月初二等日鄉夫陳大俊典史陳浩等生擒廖惠并小老人王仲甫小甲張彪徐珠等及斬首共計三百五十一名口陸續奪獲騾馬

一千餘頭匹及腦包賊衣等件審據廖惠口供手下約有七千在陣擒斬殺跌身死走脫不及七八十人與進英所報相近除廖惠王仲甫監問解京餘審真賊軍前斬首與賊級梟掛被虜脇從情重量發充軍情輕給親賊妻給配騾馬衣服財物給賞有功兵夫器械給軍銅印旗號入官張敏何珊等仍領官兵追過陝西西鄉縣務在掃平另報功次行勘的實及錢朝鳳公勉仁陸震等另叅外臣竊觀賊勢本盛彌月之間病死逾萬散亦數千一偶也賊營故遠竟之授首縣門頗省供饋二偶也雲陰下垂我營不暴河水

忽漲彼渡多淹三偶也賊首廖惠廖麻子麻六兒輩
惡不聽招撫俱先擒戮四偶也原調酉陽各處精兵
未集遽收全勝五偶也茲益仰賴

祖宗之靈

朝廷之福

皇上神威聖武至誠格

天之致然賊本良民所司不善拊馭致失其始臣又不善
招徠致失其終昔宋臣曹彬下江南不殺一人臣化
賊弗效雖則因人就緒有餘愧焉第鋒刃之下善惡
豈能盡分而首虜弗尚全活亦為稍眾斯臣所籍手
報答者也無任隕越愧懼之至緣係捷音事理謹具
題

知

叅駁楊友謀復官職衙門疏節畧

題為乞

恩俯順夷情請給印信保復衙門承襲官職撫理地方等
事據分巡川東道僉事李恕呈據委官重慶衛指揮
聶震重慶府檢校郭勝呈會同貴州平越衛指揮高
貴審勘楊友男楊弘承襲緣由到臣緣在先臣處無
行近節准兵部咨該播州宣慰使司所屬黃平安撫

身素集卷之三
奏議
司被殺土官楊才義男楊政賢奏稱楊友買借湖廣
臻洞長官劉暹苗兵八百餘衆驀進重安城詐傳
朝廷釋放將土官張銳馮經等追趕出城勘官四川左
叅議黃瓚僉事陳晞圍逼奏印等情又爲陳情分豁
事爲陳情懇乞

天恩優憐殘喘以安邊夷事該保寧羈管革職土官楊友
奏要還職承襲等因又爲苗人聚衆挾讐捉殺土官
等事該巡按貴州監察御史吳棋奏楊友與黃平安
撫司土官楊才挾讐節要捉殺正德四年閏九月十
二日忽有天苗萬餘到城將楊才私宅燒燬家人六
名并楊才殺死割頭去訖及黃平天苗天志等告黃
平所曹指揮聚集殘賊燒死各寨夷民三十六名虜
去男婦四十八名牛馬牲畜三百七十頭匹并箱籠
銀兩衣服等情各奏行兵部節查爲異省貪官主令
故縱糾拽苗人趕殺土民燒燬房屋惑動苗夷劫虜
家財奪占衙門擾亂地方急救生靈等事該播州重
安長官司土官張銳奏又爲建言地方事該監生吳
卿爲保固地方事該貴州麻哈州知州嚴傑等各奏
要將安寧宣撫司再設革任楊友宥罪降印令其撫
安夷民等因該部行准巡撫四川劉都御史咨稱勘

得成化十一年已故宣慰楊輝將庶長楊友奏保設立安寧宣撫司分管寨分楊輝故後楊友與楊愛互相計奏差刑部左侍郎何喬新錦衣衛指揮劉綱親臨會勘將楊友并宣撫司革罷經今二十餘年地方頗寧若要設立誠恐有蹈前失及該部節叅楊友係先年安置保寧閒住人數今乃擅歸舊治意欲復管苗衆及楊政賢所奏楊友謀同殺害楊才事理非輕合無仍行湖廣川貴三省鎮巡等官從公會勘查處等因節該題奉

欽依是着鎮巡等官上緊會勘明白奏來定奪着各該鎮

巡等官上緊從公會勘奏告事情議處停當奏來定奪毋致再詞欽此欽遵備咨到臣叅看流土承襲祖職法有定規舍餘奏添衙門名爲召亂楊友連年兄弟讐殺會勘奏革積禍始消且兄弟尚爾爲讐夷民何因感德縱使得衆徒長亂皆乃敢擅離遷所巧駕誣詞財買吳卿嚴傑之奏保奸弊昭然節經巡撫兵部之查叅是非明甚况楊友見今殺逐宣慰避逃何名息怨挾留守巡奏印重肆兇頑固首惡之貫盈亦群邪之唆扇各宜追究大正典刑但係夷苗及原奏本院無行今奏俱應議處已行布按二司轉行分巡會勘

去後續據按察司呈同都布按三司掌印官都指揮
僉事徐繼左布政使潘楷按察使丁養浩議得播州
宣慰使司凱離天苗爲害始於革職楊友之奸謀成
於異省劉暹之叶助糾綫苗夷動以千計既逐重安
等司之長官遂據其城又殺黃平司之同知并繫其
父人民爲其攻劫田土被其占耕計其所爲惡貫已
極因此該司并各被害官司人民合詞奏訴及照楊
友先年犯罪法所當誅荷

國厚恩羈管閒住日積月累奸計漸生植黨據巢要挾
官職雖云自相讐殺實則自速刑誅據此而言均爲
有罪但宣慰司累次告鳴情詞懇切官雖徒設民則
何辜又天壩等苗夷衆口一詞願復舊治楊友雖在
擯棄楊弘尚可收錄一則救民於水火之中一則定
亂於搶攘之際合無委官親詣從公集議只今重複
開設是否於地方有益人民無害應否改屬等因到
臣看得楊友逃避山林不服拘喚節次結構苗夷侵
疆越界殺官劫財擾亂地方或殺千三百餘人或虜
萬二千餘口或全殺數戶或全虜數家楊友應正謀
叛斬絞凌遲之刑其子楊弘應坐給付功臣之家爲
奴之典各官會議明稱楊友貫惡已極却又朦朧議

稱楊友雖在擯棄楊弘尚可收錄定處重復開設衙門前後情詞自相矛盾臣又查叅楊友逋囚扇禍虎吞諸夷罪惡貫盈但念治夷宜畧未即行誅奚至復長亂階重議衙門建置地方禍患責將誰歸扶綱常申大義議處通呈定奪未報續又據播州宣慰使司節申楊友邀引外夷越境爭謀地方等因該臣訪得楊斌取盡鎰銖剝連肌髓大失苗心楊友犬羊故性狼虎元兇大興亂首土官奢爵下寨長任唐等黨邪害正傷類敗群大乖隣好亦猶罔識禮度罔知綱常罔接正人罔聞正論合行開諭楊斌楊友奢爵并任唐等俱要洗心滌慮守分安常楊斌易濁爲廉收苗夷既失之心楊友易逆爲順消家族已危之禍奢爵任唐等易野爲靖結隣境親睦之情況楊友搆兵結怨奪地殺官延禍邊陲身爲倡亂之首已遲謀叛之誅誰敢爲之保勘奏立衙門官職是非利害甚明宜回保寧安家樂業永享太平如再違拗楊友并助亂自當奏調官兵剿滅噍類無遺楊斌奢爵亦當奏革祖職設立流官以爲叛逆助惡及不恤苗夷之戒行令遵依去後續據永寧宣撫司申楊友結黨讐殺劫掠已經呈稟上司撫勘未結隨准兵部咨該播州赤

水里土官頭目袁瑚奏楊友聚衆黨惡流劫等情奏
奉

欽依都察院行勘務見明白授狀坐視不行的一併叅了
來說備咨到臣案候奏人未到隨據播州宣慰使司差
長官劉彬齎繳造完被害夷民文冊到臣備審劉彬
供稱成化年間楊輝溺愛楊友被長官張淵頭目何
清徐泰馮瞰左道蠱惑指倚臨邊天壩千山苗讐忿
將重安舊管熟苗凱離等五十二寨并容山舊管崖
門等二十五寨槩住隨風反叛具奏興師挾撫被徐
泰等扶同扇誘苗人捏稱投認楊友管束爲詞誣其

本官強奪前寨奏設安寧宣撫司并懷遠宣化二長
官司脩築城池起蓋衙門役調數多衆苗怨恨成化
十五年聚衆攻燒懷遠長官司靖南堡殺死守備土
官男婦百十餘人後楊輝病故楊友通同張淵謀害
嫡弟宣慰楊愛奏差三司何侍郎等會同鎮巡親臨
勘處將張淵張深問狃獠造妖言謀害人命重罪處
決叅照楊輝不合溺愛庶妾之子濫設無益衙門引
惹邊釁及開設衙門之時楊友年方一十三歲本以
駮童冒功受職與楊愛構怨同處一州必致互相殺
戮將楊友連家小遷發保寧府羈管閒住革罷宣撫

等司衙門印信奏繳將重安長官司遷入安寧城內
居住迄今二十餘年邊釁頓息近年以來被楊友希
圖復任賄結隣境貴州所屬鎮遠施秉邛水等縣無
籍軍生吳卿等假以建言爲名朦朧代奏蒙行川貴
撫按勘議不必添設備由回咨兵部查奏立案不行
正德三年忽被楊友令家人石長子等潛結劉暹借
兵驀進重安城內大張聲勢奪占城池節申上司未
蒙會處以致楊友窺伺本年九月內棄脫保寧逃回
重安大肆逞威僭封天苗都把事名色分投糾拽隣
境各處山苗萬衆突入黃平草塘二安撫司白泥容
山等長官司地方張打旗號殺降官民詐稱

勅旨

以烏江爲界黃平等五司地方撥與管束敢有不順

斬草除根各司安撫長官挈家奔投鑽遠避難止有

同知楊才固守楊友節次差人逼勒宣慰父子保復

其官給還印信如有不從定統苗兵過江攻殺一人

不留只得曲保楊友又差家人監同去京具奏正德

四年六月蒙分守川東道按臨撫勘先給告示發屬

曉諭各苗革化歸附原管官司驀被楊友奸計輒請

二司進興隆衛約會貴州該道議處乘機聚衆困逼

二司挾要出與再設衙門降印保官其子文書遂爲

得計統領衆苗突攻黃平守禦所城捉虜楊才碎剝身屍砍頭去訖本年十月起至今正德五年二月以來慕被奢爵管下任唐阿曉等先後聚領狍獠兇蠻四萬餘衆分投各路攻劫播州所屬各苗打話去年以來楊友刻木送書與奢主人借軍助殺你播州言斷許我殺到何處占到何處節申鎮巡三司議處未蒙發兵救援致被得肆本年三四月以來復聚苗入境流劫其勢尤甚生靈肝腦塗地等因又據重慶府綦江縣申爲苗賊出境事被蘭州等處苗賊前來梁村等處流劫王旻等五百餘家虜去男婦十餘口殺死王伸等八名客商不計其數又將安穩里野茶坎高羨宗等家盡行劫殺聲言要往扶歡三溪等處各苗口稱前來借路往保寧府劫取楊友家眷回還等因除行該府將楊友家人婢妾存留看守家財房屋妻子密切差官護送按察司收候防守外臣叅看土官地界多至一月程途安寧去播州僅六餘日何名別開衙門土官軍功不過厚加金幣楊友征山苗僅十餘歲何功應保官職而楊輝之溺愛欺罔自明安寧設立衙門官職夷亂如彼革罷衙門官職夷靖如此今楊友謀復之奸始萌奪殺之禍大熾而衙門之

建置利害又明易曰天澤履君子以辯上下定民志
昔唐徇行伍置主帥任藩鎮邀朝命姑息成風禍亂
莫救今楊友逋播小夷構黨跋扈殺宮奪寨大啓亂
階若非明正典刑誠恐效尤難制但四川見征藍五
又征楊友不無勞人伏望

聖明力止亂源

特勅該部查議將楊友助兵代奏流土群黨行湖廣四川
撫巡各按所屬查提官武職降二級總旗降軍與軍
各調邊衛帶俸着役文職與土民監生各發口外為
民土官奢爵王鳳儀革冠帶楊斌降宣慰使嚴限文
書到日為始三月之內捕拏楊友楊弘石長子王小
童并各酋惡首天保川等同劉暹金洪楊春楊璽楊
淳等各解官查審各該勘官有無賄囑亦就查提依
律問罪情輕先行摘發情重奏

請發落殺虜人口財物燒毀房屋一依土俗賠償撫處停
當奢爵王鳳儀方復冠帶楊斌方復官職違限不獲
及各酋仍復為惡奢爵王鳳儀革職楊斌再降二級
若仍回護致勞我師將土官通行革去另設流官庶
法令嚴明兵糧不費朋邪知懼而邊方可寧緣係禁
治群黨議處叛夷查提職官事理具本謹題請

旨

致仕疏

題爲懇乞

天恩俯容致仕保全殘喘事臣氣體羸薄多疾早衰又因父老且病累乞休致荷蒙

俞允私心感幸父子相守畢殘年酬素分

陛下造化曲成之賜也不謂罪積緣淺臣父竟見背口血猶紅時月斯邁是日服闋是日有征勦川賊之

差義不可辭而精力不可耐謹束斂衣自隨越四日而離家越月有五日而到夔日兼數程衝泥沾濕顛墜日

常數四既至軍務叢委臣才短愈見勞憊每發兵則終夜不睡痢疾尋痊痰嗽繼作時發潮熱停刻無容休養即今風濕日深聽日重視日曠心日健忘血氣日虛胃日弱粥食日以少進譬如老馬力盡策之而弗前腐根之木非兩濡露沐所能液潤之也恐即死無足副

上意伏賴

神謨渠魁日漸授首餘亦釜中之魚劉臬非死即逃杳無聲迹似亦未足深憂而安寧楊友之亂諸番之警郡縣盜賊之竊發尚厪

見素集卷之三
聖懷然巡撫得人禍患亦弭臣實老加病力難強支雖
上恩浩蕩若在優容而下屬觀瞻自知非雅况臣一應錢
糧出納俱付廉謹委官自不經手別無違礙伏望
聖明憫臣衰老之甚

特勅吏部查照養病都御史高明征閩事例容臣班師順
回致仕使啓衾骸骨得遂故山又
陛下造化曲成之賜也奄奄斷息愧伸一報以無期耿耿
幽魂特先百神而助順無任懇切求憐之至正德五
年十月二十日奏奉

聖旨林俊才行素著多効功勤方切委用宜用心勦捕賊

寇撫安地方所辭不允吏部知道

奪獲流賊印刀疏

題爲殺敗流賊奪獲印刀事據領兵川東道左叅政曹

祥僉事李恕川北道知府張敏何珊呈正德五年六
等月蒙巡撫行委各領漢土官兵截殺大夥流賊藍
廷瑞鄢本恕等各兵節勝賊節敗追過陝西大巴山
西鄉石泉金州地方會合陝兵截殺獲功節報開

奏外本年八月二十三日賊圍陝兵川兵羅回等救出
又發酉陽冉舜臣兵遶從賊後衝殺斬獲兩耳小功
五十四副各賊計窮渡任河不得將被虜婦女騾馬

砍死分作二夥藍廷瑞一夥從小石河黃瓜溪要衝
金州鄆本恕一夥從三十六盤要衝二州堽康總兵
統領湖兵萬餘在金州梁山雲陽奉節義官徐敬之
等統民快弩手三千六百在二州堽各守把川陝會
同康總兵許領湖兵黃瓜溪夾攻不會前來曹祥李
恕領冉舜臣并石砬馬徽等兵為前哨張敏何珊領
羅田大渡河標手達新等兵為後哨分路追殺本月
二十七日藍廷瑞訪知金州有兵陝西三十六盤無
兵又合鄆本恕從鷄鳴坡黃瓜溪將虜去男婦二百
餘人放散砍木搭橋越過本盤因見陡峻沿途并崖
下跌死人馬數百本月二十八日到麻柳壩藍廷瑞
見二州堽有兵難衝議要聽撫最惡老人王三兒怪
說你起的事我殺了母親祭旗跟你如何退悔先殺
了你藍廷瑞懼怕王三兒領賊當前衝關被徐敬之
等敵鬪掀放礮石打死王三兒并各賊不計其數生
擒四名本年九月初一日賊願丟騾馬金銀買路徐
敬之不從又與敵陣斬獲長脚王老人等五十餘級
奪獲腦包五十箇并絮被衣服等件追至小關子賊
走過河淹死三百餘人生擒鄆本恕男鄆統發解賊
八十餘騎跟奪只得砍死本月初二日賊分夥前來

自卯至酉連闔七陣俱敗藍廷瑞因見官兵追近向賊聲說如今再無別路衝不過便死在此詐來打話你不放我過關拜你四拜退去陝西莫要追趕各兵輕信怠緩彼力猛衝將徐敬之胥旺殺死餘兵鑽林被賊尋殺五六十人奪燒米四十餘石醫官張錦自刎身死陝兵就麻柳壩駐劄川兵追過土垵雞公灘本月初八日冉舜臣兵斬獲耳功七十二副生擒四名馬徽冉鵬兵斬獲耳功一十一副生擒六名本月初九日追至雞公嶺冉舜臣兵敵斬掠陣徐老人等耳功三十六副生擒二名馬徽冉輔兵斬獲六副生擒三名汪林丁祥楊鎮何仁各一副張漢向銀生擒二口本月十一日賊奔湖陝城口山界川兵追襲本月十四日至巴河口賊二起九人探風被冉舜臣兵斬獲耳功八副鄉夫龐襲宗殺一人不割報功軍人謝受等擒獲二口本月二十二日追至繡雞嶺吏何定同達縣勇手奮勇過河賊多兵少齊趕到河何定赤身水中執弓對射賊方退隔江架梁遇冉舜臣馬徽魯忠田金并

旗牌官王來譚宣督兵俱到何定率同過河衝破賊陣追敵二十餘里落水淹死不計其數斬獲耳功二百

三十九副生擒二十四名至風扇埡藍廷瑞設酒請
鄆本恕議降鄆本恕又怪要殺嗔說再看如何大寧
分開一兩人逃走亦易賊老營極高架梁冉舜臣兵
呐喊徑衝上梁各賊大敗走上高觀山官兵在陝口
各劊營本月二十四日早賊分前後左三支衝營馬
聰先期發兵架梁酉陽石砭儼回等漢土兵亦分三
支迎擊賊又大敗乘勝追至高觀寺敵聞何定領兵
要衝老營尋無路道本月二十五日馬徽兵奮勇衝
營賊來追趕張敏何珊儼回將賊射退譚宣等兵又
會藍廷瑞鄆本恕見得馬徽兵近疑是賊勝回還歡
喜問信被馬徽等兵趕殺官兵從後放銃呐喊西風
甚急聲震如崩賊又大敗登山架梁冉舜臣兵追趕
賊搗石打傷二兵各兵奮勇直衝上梁賊丟下男女
五六百人騾馬八千餘匹阻塞路道領兵官督令各
上兵將騾馬砍死直趕過山斬獲耳功二百二十三
副衝鋒老人蕭伯瓊奪獲藍廷瑞偽號順天王管軍
萬戶府偽印一顆何定奪獲關公大刀一把未刻字
偽稱玉印即水晶印一顆周畿奪獲景泰元年天威
一千一百二十四號
頒降不知何衙門碗口大銅銃一口重一十一斤藍廷

瑞隨身金銀三馱被兵溷搶一馱藍廷瑞荒張賊衆
六人扶伊逃走餘賊追趕下崖跌死男婦騾馬不計
其數三溝俱滿土兵鄉夫四人下崖砍殺未盡強賊
內有少婦二口壓在馬下叫說藍鄆老人妻小俱在
溝底帶有金銀一十八斤你來救我各兵拖扯不動
見有強賊身騎白馬前來天色亦晚只得俱退收拾
未盡騾馬尚六千爲因追賊地遠糧夫難到日夕缺
食將馬亂殺割肉充饑尚約騾馬二千餘匹土兵分
收男女審有籍貫給票照回訖各兵回營當夜賊將
跌溝人馬通燒未盡藍廷瑞鄆本恕就彼痛哭與妻

燒紙因見事迫山險男女累重騾馬難行不忿丟與
官兵自行砍死十五歲十六歲男子味溪一處四十
餘人密柴河魚洞子二處各三十餘人沿途婦女騾
馬數百土兵尚收遺下騾馬四十餘匹藍廷瑞將銀
二馱通行散與手下心腹四十餘賊令各走散至小
坎山百丈懸崖前無路道轉彎倒樹一根傍生茅草
賊疑木橋向上奔走跌落身死六七百人餘賊男婦
尚約二三千人鑽林奔走搜山斬獲耳功一百零九
副生擒男婦二十九名口前後奪獲賊旗二十七面
賊印銅木共五顆賊批一十五張賊卯簿二扇鉄鏡

二把賊神八座腦包賊衣護心鎗刀箭袋共二百七十一件其餘鎗牌鞍轡數千路險難搬丟棄山澗各賊奔走松家山馬邊河分為三夥一夥走湖廣房竹脚跡稍多林密山險無路進兵一夥走陝西平利脚跡頗少一夥走大寧脚跡亦多發兵把截回路行文湖陝就彼發兵截殺大寧選精兵三千追趕餘兵轉蹴其前夾攻等因又據鄉夫范金積捉獲賊老人秦景榮總甲吳全捉獲賊總甲徐么子并虜去為妻古么女賊從王子賢王伯祥并總旗打手地方楊鎮張鸞王海隆周伸方王大宗王金典史涂仁捉獲賊男婦劉聰王章廖大益小端公張奉山謝萬明馮本聰等及李明通認獲投營王相等共二十一名口斬獲耳功四副除跌崖落水等項身死及各土兵收留隱匿未報不論外通計耳功八百二十七副生擒九十八名口各到臣審據秦景榮等執稱藍廷瑞管軍萬戶府印係眉州古樹中檢得不係自造大刀名關王刀不知何處得來對賊聲言天賜我印刀佐天大王草寇三年因此各賊歸附馮本恕在小坎山跌死俱難憑信二州堽差人數至河下死屍三百四十四軀地方執稱賊殺兵快約有百人餘俱賊屍其騾馬照

依兵法克賞土兵子女待兵回官與贖取并解到人
贓給發問決釋放外切照大巴山星子山三十六盤
脩立山高眉山黃墩望信松家山等處危峻無比秋
多積雪皆緣藤接索釣崖下上又有陡壁千丈下臨
不測之淵荒路一線時復中斷獨木引過賊行多墜
逆料我兵決不能追不想曹祥李恕張敏何珊魚貫
猿攀率兵偕進步數里之深叢渡踰曾之深水至經
絕險慰安前行露宿風餐少壯成老因此賊敗但鼯
後追奔房竹平利二夥因險中輒分屬湖陝之兵亦
偈一欠臣再督擒勦務期盡絕外叅看各賊慘酷兇
狂天醜其惡屢致消滅雖惡首未即就擒然驟馬垂
盡長技已去群心亦解勢難復盛仰賴

皇上勇智

天錫添設總制督師及將士用命之致臣提兵三月尚漏
元兇老師費糧深負罪愧除秦景榮監候藍廷瑞鄔
本恕等各獲問報前後有功漢土官兵通行紀功覆
實具

奏定奪伏望

特勅該部查議將領兵曹祥李恕張敏何珊先量具
奏旌擢以勵勞臣緣係殺敗流賊奪獲印刀及旌擢勞

身素集卷之三
奏請
臣事理謹題請

旨
災異處置地方疏

題爲災異事據保寧府通江縣申正德五年六月初十日辰時分本縣對面隔河壁山無故山崩石墜聲如震雷本年九月二十四日申酉時分縣西新築城垣城門內外無故地裂土縫縱橫文如劈斧思當流賊擾攘之際值二異常之變民心驚惶誠恐有關時運人事到臣案照先據成都府威州申本年七月十五日巳時分本州地震如雷自西而起向東而去茂州

本日同時地震有聲自東而起向西而去潼川州樂至縣申本年九月十九日寅時分地震街市房屋俱動夔州府申本年六月二十日午時大竈民謝得安家火起延燒居民房屋一千餘家重慶府酆都縣申本年七月二十六日夜一更時分天墜火星蘇么老屋上隨即火起惡風大發將本家并街坊三百二十餘家并本縣儒學公廨泮宮坊牌酆陵驛城樓城門鼓樓板房等項俱各延燒重慶府申本年十一月二十一日天色陰晦當夜戌時迅雷大震閃電交作人民驚駭等因前來及查本年三月初二日午時分

夔州府并雲陽縣同日地震本年四月二十六日巳
時分通江縣鸚哥鋪營頭星墜大如斗尾長丈餘碎
星附其尾等因已經具

題外今該前因臣叅看天宜順而熒惑營頭爲崇雷電
作於冬月至不順也地宜靜而山崩地裂地震至不
靜也是皆政急兵起土崩之兆夫天道人事常相孚
四川古稱多盜亂必居先平必居後在漢有公孫述
在宋有孟昶在

國朝有明昇皆最後服其他王小波板循張弘白馬胡
瀘州夷與近時劉千斤趙鐸野王剛石和尚羅端公
楊亨小楊兇党廷方藍四之徒不可枚舉然皆無如
今日之甚訪問故老委因賊臣劉瑾故亂天下以資
逆謀革巡撫兵備撫民巡捕統理專理俱無其官守
巡巡歷難週強盜乘時生發此盜之所由起也荒旱
連歲不容奏災盜賊四起不容奏

聞此盜之所由盛也慘毒兇狼拏官罰米緝事取禽鳥等
物騙索無厭賊瑾取之官官取之民手下差遣又因
爲利剥民至骨盡離其心此盜之所由縱也興師動
衆居送行齋不勝楚毒貧民重困視官如囚至越名
分輕公法劫縣殺官擒戮方面而無畏夫賊瑾所致

夔保強賊五七餘萬三省夾攻勢已大挫僅二三千人軍兵從後急追尚能收拾散盜敵殺一方面一典史攻劫三縣治今雖添兵會勦豈能遽絕賊瑾所黨楊友激出南川之盜數不至千亦能殺一方面一府官二巡檢掠執一方面攻殺二縣治今雖集兵擒勦豈能遽盡而播州之患又重且大近在旦夕四川倉庫匱竭見今兵餉日苦不給而松潘各邊月告無糧調運不休他變必作臣恐首亂者致亂而救亂者亦生亂况臣出入賊區巡撫政務無暇經理自念分甘一壑迹久付於雲泉

詔起兩川命重懸於鋒刃然鞠躬盡瘁繼之以死臣所也至於成敗利鈍非臣所能逆覩伏望

聖明垂念地方亂之甚易而救之甚難將賊瑾贖銀量發數萬差官前來賑濟以收川民既離之心

勅戶部從宜區處各布政司兩直隸那借官銀共二十萬兩以實川邊及軍儲等用稍輕舊則限定生員入監知印承差吏典叅充各名數行令自願納銀以足補為限四川生員入監亦定名數并知印承差吏典義官各納銀以高厚城垣脩蓋被賊燒燬公廨舖舍等項及增實各倉預備之穀以足用為限擇委有司督

理守巡督查俱出雇買不科役民一財一力其清道
監察御史政務頗暇專令督察毋容貪濁乘機迫幼
及科索起送公堂紙劄并剋落重派虛費等弊
勅兵部會府部大臣議處楊友衙門官職應否與復明白
奏

請毋仍展轉行勘致誤地方若不應復乞降榜文曉諭川
貴湖廣附近播州流土衙門不許暗助楊友爲亂其
楊友果能革心悔罪宥以一家死罪回居保寧安享
太平應得田產此賣彼置兩斷往來永杜後禍如再
叛逆決行征勅黨惡助亂法在不赦以絕楊友妄覲
之念楊斌謀陞按察司官職亦行革去手下助惡科
斂家人管事并楊友助惡殺害家人苗頭撫到官如
法究治以釋苗民剝削戕戮之忿

勅吏部專任才名風力司府等官及會推公謹忠亮精力
大臣

簡命一員前來巡撫臣專討藍賊天幸成功得貸萬死容
歸骸骨庶官使得人民困可蘇盜賊可息邊患可消
而天變可回緣係災異及處置地方等項事理謹題
請

旨

江津捷音

題爲捷音事節據領兵副使何珊呈正德五年十月
蒙巡撫委同守備大壩以都指揮體統行事指揮李
蔭帶同舍人韓恩等領兵征勦攻打縣治執戮方面
流賊曹甫等除節獲首級四十三顆副生擒一十一
名口殺死一百七十八名馬四十七匹開報具

題外本年十二月賊移黃鸞驛聲言要攻瀘州曹甫曹
濬党么兒稱總兵設卯簿揀選殺手四百六十九名
編立旗甲餘外投營被虜男婦約二千人架梁發哨
擅打報帖僭稱順秦王明正元年統兵來瀘州仰掌

印官多備糧草伺候及逼州城聲言官備銀三千兩
城內鄉官大戶湊銀二擔買免攻城該續委分巡副
使蔡鍊同何珊李蔭嚴加守把巡撫節行撫諭本月
初九日曹甫等對州沙灣詐願聽撫蔡鍊等令韓恩
同伊弟韓懋乘船江中撫講韓懋尋復登岸面會曹
甫陽順陰違蔡鍊等又拘曹甫戶長曹永金等招撫
曹甫將綠段旗一面書青帝旗帶見蔡鍊說稱本
月十二日二百餘人赴州聽撫要備酒席當早曹甫
又不願撫同已殺弟曹瑄領賊流劫小市廂李蔭同
韓恩領羅回等兵過江敵鬪斬獲曹瑄等首級一十

八顆生擒四名奪獲馬二十六匹腦包弓鎗賊衣共
一十八件本月二十三日李蔭追至史壩驛敵闖一
十二陣斬獲首級并兩耳小功共四顆副生擒四名
殺死未斫首級八名射傷十名射傷馬一十餘匹奪
獲腦包弓鎗賊衣一十一件本月二十五日各賊仍
移江津馬鞍山幸家壩胡玉璽等家分割七營聲言
要攻重慶巡撫議令蔡鍊同叅議錢朝鳳固守瀘敘
催兵督餉何珊李蔭追賊江津正德六年正月初一
日巡撫親督酉陽播州土兵前來江津通發李蔭添
領本月初二日寅時攻破党么兒等四營斬獲首級

一百九十一顆兩耳小功一副生擒賊婦二口奪獲
腦包一十二箇騾馬三十一頭匹另外斫死騾馬三
十頭匹餘賊敗入人家土兵圍守放火燒死三十餘
人李蔭同從征重慶衛指揮汪洋張勇將功驗訖酉
陽土兵乘勝再搗老營曹甫等設伏死戰士兵稍却
殺死汪洋并兵夫四十餘人執去瀘州衛百戶胡經
播州長官王墳江津義官江都賊知大挫併入胡玉
璽家大營令方四張孫兒汪鵬同趙金統對面方山
劄二小營逼令王墳依寫願撫呈文與胡經等送回
巡撫又差生員傅禮入營撫諭曹甫執要銀二千兩

贖取王墳及與重慶住食不肯分散巡撫令李蔭統領土兵四千六百餘名并鄉夫等兵進合山坪與賊相隔一十五里劄營軍令先射馬次射人又恐溷殺老幼令傅禮進營挾撫曹甫等愈加生物大言我俱是老殺手隨他土兵總是不怕傅禮回報本月十二日五更時分曹甫探知精兵在營江津守兵輒脆議發一支拒敵兵營另發一支勇漢二百騎徑衝江津三十騎先鋒出哨不意巡撫督催李蔭兵三支先進至佛子崖與賊相遇標手將穿紅突陣賊首白馬標劉羅回等奮勇敵斬一十五級餘賊追逐不及回報

我兵圍住老營賊方知覺倉卒閉門備馬出戰被王墳誑說兵多不好出巡撫實要招撫我與你退兵乘機走出指點土兵一齊放火及上房敵聞巡撫又委書吏軍牢并楊瑞韓恩等催兵各殊死戰斬獲各首曹甫曹濬曹弼曹珣曹玉何裁縫張端公張外郎曹永興周黑子李寨長王長生曹珠汪鵬但廷秀等首級并兩耳小功共五百一顆副殺死未割首級不准功二百九十名生擒賊從并曹甫妾陳氏曹濬妾楊氏曹珠妻張氏曹玉妻党氏曹瑄妻任氏張外郎妻王氏但廷秀妻張氏周四妻徐氏等三十五名收回

被虜老幼男婦七百二十名口燒死九百餘名口奪
獲騾馬八百餘頭匹斬獲騾馬四十二尾腦包八十
箇賊卯簿三扇我兵全勝功級生擒巡撫軍前驗發
何珊責令賊婦供認賊首各級俱在止有曹甫汪鵬
但廷秀親見殺死認無首級恐供不實未決存亡惟
方四等方山二小營走脫簿查正賊方四下僅六十
六名汪鵬下僅九名張孫兒趙金統下各僅十名又
多在陣殺死及鄉夫陸續擒斬共七十九名顆在逃
正賊似不及三五十人并被虜老幼男婦不及百餘
發兵發牌四處搜捉想難漏脫李蔭揚瑋親驗胡玉
璽家住房九十餘間燒死賊屍枕籍數重三日未盡
楊氏雖係虜來爲妾催兵上陣殺人尤狠等因到臣
除楊氏及真賊照奉

欽依軍前斬首首級分發梟掛賊屬問發被虜給主騾馬
充賞腦包鎗刀馬尾貯庫未獲方四等仍發土兵追
勦及嚴督各隘俟拏有功官兵另行造冊具

奏外臣會同四川鎮守太監常興巡按監察御史俞緇
議照賊首曹甫曹濬等逋誅宿寇大肆猖狂虎闖邁
于魁酋梟雄挾其絕技蹂躪我數縣睥睨我大州甚
至執戮風憲僭書名號而無忌兇獷効尤遠近俱震

師貞而吉狡三窟以徒營天禍其盈收一網而俱盡
斯固

朝廷之福川蜀之幸成此大創者也然臣仰窺
聖意以愛人爲德而臣顧以殺人爲功不勝罪愧首末領
兵李蔭尤爲屢危不憚及前征東鄉有功今仍擇委
征藍合無將本官量陞都指揮僉事職銜以便行事
緣係捷音及陞任官員事理謹題請

旨

書